

დამტკიცებულია: სსიპ საქართველოს შოთა რუსთაველის თეატრისა და კინოს  
სახელმწიფო უნივერსიტეტის წარმომადგენლობითი საბჭოს მიერ

*სხდომის ოქმი №/სხდომის ოქმი №3 11 მაისი 2020წ./  
ცვლილება /სხდომის ოქმი №8 13 ოქტომბერი 2020წ./  
ცვლილება /სხდომის ოქმი №9 6 ნოემბერი 2020წ./  
ცვლილება /სხდომის ოქმი №20 29 ნოემბერი 2023წ./  
ცვლილება /სხდომის ოქმი №3 19 მარტი 2026წ./*

*ცვლილება/სხდომის ოქმი*

საქართველოს შოთა რუსთაველის თეატრისა და კინოს სახელმწიფო უნივერსიტეტი



სსიპ საქართველოს შოთა რუსთაველის თეატრისა და კინოს სახელმწიფო უნივერსიტეტის მიერ  
სტუდენტის სწავლის, საკურსო/საკვალიფიკაციო ნაშრომის (შემოქმედებითი პროექტების) და  
კვლევითი/შემოქმედებითი პროექტების დაფინანსების წესი

## **მუხლი 1. რეგულირების სფერო**

1.1. წინამდებარე წესი არეგულირებს სსიპ საქართველოს შოთა რუსთაველის თეატრისა და კინოს უნივერსიტეტის მიერ სტუდენტის სწავლის, საკურსო/საკვალიფიკაციო ნაშრომის (შემოქმედებითი პროექტების) და კვლევითი/შემოქმედებითი პროექტების დაფინანსების წესს;

## **მუხლი 2. სტუდენტის სწავლის დაფინანსება**

2.1. სსიპ საქართველოს შოთა რუსთაველის თეატრისა და კინოს სახელმწიფო უნივერსიტეტი სწავლის დაფინანსებას უზრუნველყოფს ბაკალავრიატის და მაგისტრატურის საფეხურების მხოლოდ იმ სტუდენტებისთვის, რომლებიც მოქმედი კანონმდებლობის დაცვით უმაღლეს საგანმანათლებლო დაწესებულებაში ჩაირიცხნენ 2026 წლამდე.

## **მუხლი 3. სტუდენტის სწავლის დაფინანსების უფლება**

3.1. სტუდენტი სწავლის დაფინანსების უფლებას მოიპოვებს პირველი სასწავლო სემესტრის დასრულების შემდეგ;

3.2. მობილობით გადმოსულ სტუდენტებს სწავლის დაფინანსების უფლებას მოიპოვებს უნივერსიტეტში ჩარიცხვიდან ერთი სემესტრის შემდეგ;

3.3. სტატუსადგენილ სტუდენტს სწავლის დაფინანსების უფლებას მოიპოვებს სტუდენტის სტატუსის აღდგენიდან ერთი სემესტრის შემდეგ.

## **მუხლი 4. სტუდენტის სწავლის დაფინანსების ვადა**

4.1. სწავლის დაფინანსება ხდება სემესტრულად და მოქმედებს ერთი სემესტრის განმავლობაში.

## **მუხლი 5. სტუდენტის სწავლის დაფინანსების პროცედურა**

5.1. სტუდენტი მოიპოვებს სწავლის დაფინანსებას მისი საშუალო ქულის დაანგარიშების საფუძველზე, სემესტრული სარეიტინგო მონაცემების მიხედვით, იმ შემთხვევაში თუ ის არ არის სახელმწიფო სტიპენდიანტა სიაში.

5.2. სტუდენტის საშუალო ქულის დაანგარიშება ხდება სასწავლო ელექტრონული სისტემის (ბაზის) მეშვეობით, სტუდენტის სასწავლო ბარათში მოცემული ინფორმაციის საფუძველზე, შემდეგი წესით:

5.2.1. სემესტრული გამოცდების ფარგლებში სტუდენტის მიერ თითოეულ სასწავლო კურსში მიღებული შეფასება მრავლდება ამ კურსის კრედიტების რაოდენობაზე;

5.2.2. სემესტრული სასწავლო კურსების შეფასების ნამრავლთა ჯამი იყოფა ყველა სასწავლო კურსის კრედიტების საერთო რაოდენობაზე და მიღებული სიდიდე წარმოადგენს საშუალო ქულას.

5.3. სტუდენტს მიეცემა სწავლის დაფინანსება მხოლოდ იმ შემთხვევაში თუ მას ათვისებული აქვს სასწავლო გეგმით გათვალისწინებული ყველა კრედიტი და თუ შესაბამის სემესტრში თითოეული სასწავლო კურსის შეფასება არ არის 91 (A) ქულაზე ნაკლები.

5.4. ყოველ სემესტრში დაფინანსებული სტუდენტების მაქსიმალური რაოდენობა არ უნდა აღემატებოდეს ფაკულტეტზე არსებული აქტიური სტუდენტების საერთო რაოდენობის 5%-ს.

5.5. დასაფინანსებელი სტუდენტების სახელობით სიას და ოდენობას წინამდებარე წესის შესაბამისად ადგენს ფაკულტეტის საბჭო და განსახილველად და დასამტკიცებლად წარუდგენს ადმინისტრაციის ხელმძღვანელს, რომელიც სტუდენტების სწავლის დაფინანსების თაობაზე გამოსცემს ინდივიდუალურ ადმინისტრაციულ-სამართლებრივ აქტს/ბრძანებას.

5.6. წინამდებარე მუხლით დადგენილი წესისგან განსხვავებული/განსაკუთრებული შემთხვევების შესახებ (არსებობის შემთხვევაში) ინფორმაციას (სტუდენტთა სახელობითი სია და შეფასებები) ფაკულტეტის საბჭო აწვდის ადმინისტრაციის ხელმძღვანელს, რომელიც, შეხედულებისამებრ, საბოლოო გადაწყვეტილების მისაღებად აღნიშნულს განსახილველად წარუდგენს წარმომადგენლობით საბჭოს.

**მუხლი 6. საბაკალავრო საფეხურის სტუდენტის საკურსო ნაშრომის (შემოქმედებით პროექტის), სამაგისტრო საფეხურის სტუდენტის საკვალიფიკაციო ნაშრომის (შემოქმედებით პროექტის) და სხვა სახის შემოქმედებითი პროდუქტის დაფინანსება**

6.1. სწავლის მეექვსე სემესტრში უნივერსიტეტი აფინანსებს საშემსრულებლო შემოქმედებითი საგანმანათლებლო პროგრამის საბაკალავრო საფეხურის სტუდენტის საკურსო ნაშრომს (შემოქმედებით პროექტს);

6.2. სათეატრო მიმართულების სარეჟისორო ჯგუფებში სადადგმო საკურსო/წინასაკვალიფიკაციო ნაშრომის (სპექტაკლის) დაფინანსება ხორციელდება ინდივიდუალურად. ერთი საკურსო სპექტაკლის დაფინანსება შეადგენს 500 ლარს;

6.3. სათეატრო მიმართულების სამსახიობო ჯგუფებში სადადგმო საკურსო/წინასაკვალიფიკაციო ნაშრომის (სპექტაკლის) დაფინანსება ხორციელდება ჯგუფურად. ერთი საკურსო სპექტაკლის დაფინანსება შეადგენს 5000 ლარს;

6.4. აუდიო-ვიზუალური მიმართულების საკურსო/საკვალიფიკაციო ნაშრომის (ფილმის) სრულად დაფინანსება ხორციელდება ჯგუფურად, სხვადასხვა სპეციალობის (კინო-ტელე რეჟისურა/საოპერატორო/ხმის რეჟისურა) სტუდენტთა გაერთიანებით. სხვადასხვა სპეციალობის (კინო-ტელე რეჟისურა/საოპერატორო/ხმის რეჟისურა) სტუდენტთა გაერთიანება ერთობლივი საკურსო/საკვალიფიკაციო შემოქმედებითი პროდუქტის (ფილმის) შექმნა დაფინანსდება:

- ✓ საკურსო პროექტი -1050 ლარით
- ✓ საკვალიფიკაციო პროექტი - 3700 ლარით.

6.5. სწავლის მერვე-BA / მეოთხე-MA სემესტრში უნივერსიტეტი აფინანსებს საშემსრულებლო-შემოქმედებითი საგანმანათლებლო პროგრამის საბაკალავრო/სამაგისტრო საფეხურის სტუდენტის საკვალიფიკაციო ნაშრომს (შემოქმედებით პროექტს);

6.6. სათეატრო მიმართულების სარეჟისორო ჯგუფებში სადადგმო საკვალიფიკაციო ნაშრომის (სპექტაკლის) დაფინანსება ხორციელდება ინდივიდუალურად. ერთი საკვალიფიკაციო სპექტაკლის დაფინანსება შეადგენს 1000 ლარს;

6.7. სათეატრო მიმართულების სამსახიობო ჯგუფებში სადადგმო საკვალიფიკაციო ნაშრომის (სპექტაკლის) დაფინანსება ხორციელდება ჯგუფურად. ერთი საკვალიფიკაციო სპექტაკლის დაფინანსება შეადგენს 5000 ლარს;

6.8. თუ აუდიო-ვიზუალური მიმართულებით წარმოდგენილ პროექტში არ მონაწილეობს სტუდენტი ოპერატორი ან ხმის რეჟისორი, შესაბამისად, პროექტის დაფინანსებას მოაკლდება მათთვის განკუთვნილი დაფინანსების წილი:

საკვალიფიკაციო პროექტზე:

- ✓ ოპერატორის შემთხვევაში - 1200 ლარი
- ✓ ხმის რეჟისორის შემთხვევაში - 1000 ლარი

საკურსო პროექტზე:

- ✓ ოპერატორის შემთხვევაში - 300 ლარი

✓ ხმის რეჟისორის შემთხვევაში - 250 ლარი

6.9. ქორეოგრაფიული/სამუსიკო მიმართულების საკვალიფიკაციო შემოქმედებითი პროექტის (საკონცერტო პროგრამის) დაფინანსება ხორციელდება ჯგუფურად. ერთი საკვალიფიკაციო საკონცერტო პროგრამის დაფინანსება შეადგენს 500 ლარს;

6.10. აუდიო-ვიზუალური მიმართულებით ჯგუფურად დაფინანსებული საკვალიფიკაციო ნაშრომი უნდა შესრულდეს და წარდგენილ იქნას დაცვაზე თანხის ჩარიცხვიდან ერთი წლის ვადაში;

6.11. თუ დაფინანსებული საკვალიფიკაციო ნაშრომი არ შესრულდა და არ იქნა წარდგენილი დაცვაზე, სტუდენტს ეძლევა უფლება მომდევნო ორი წლის განმავლობაში (დამატებით სემესტრებში) მოამზადოს და წარადგინოს დაცვაზე ახალი პროდუქტი თვითდაფინანსებით: პირველ წელს პროგრამით დადგენილი კრედიტების (BA-15 ECTS/ MA-20 ECTS) საფასურის გადახდის შემდეგ, ხოლო მეორე წელს, სრული სემესტრის სწავლის საფასურის გადახდის შემდეგ, სასწავლო პროცესის მარეგულირებელი წესის თანახმად;

6.12. სადისერტაციო ნაშრომის შემოქმედებითი პროდუქტის დაფინანსების საკითხი განიხილება ფაკულტეტის საბჭოს მიერ ინდივიდუალურად, დისერტაციის ხელმძღვანელის წარდგინებით, შესაბამისი დოკუმენტაციის საფუძველზე. სადისერტაციო ნაშრომის შემოქმედებითი პროდუქტის დაფინანსების მაქსიმალური თანხა შეადგენს 1500 ლარს;

6.13. ფაკულტეტის საბჭოს წარდგინებით, ინდივიდუალურად დაფინანსდება თეორიული მიმართულებების (სახელოვნებო მეცნიერებები/მედია/მენეჯმენტი/ტურიზმი) საკვალიფიკაციო ნაშრომის შესრულებისათვის საჭირო აქტივობები: საარქივო და სამუზეუმო მასალების მოპოვება გადმოწერა, ფოტო-ვიდეო გადაღება და სხვ. ამ შემთხვევაში, საკვალიფიკაციო ნაშრომის ხელმძღვანელმა უნდა მიმართოს ფაკულტეტის საბჭოს შესაბამისი აქტივობების აუცილებლობის შესახებ.

## **მუხლი 7. სამეცნიერო-კვლევითი/შემოქმედებითი პროექტის, პროექტის ფარგლებში ფოტო-ვიდეო გადაღების, მასტერკლასის/გამოფენის ორგანიზება ჩატარების და სხვა ხარჯების დაფინანსება**

7.1. უნივერსიტეტში სწავლის დროს, სამივე საფეხურზე, სტუდენტს შეიძლება მიეცეს დაფინანსება ინდივიდუალურად, სამეცნიერო კვლევითი/შემოქმედებითი პროექტის შესასრულებლად: საარქივო და სამუზეუმო მასალების მოპოვება-გადმოწერა, კვლევის/შემოქმედებითი პროექტის ფარგლებში ფოტო-ვიდეო გადაღება, სტუდენტის მიერ ინიცირებული მასტერკლასის/გამოფენის ორგანიზება-ჩატარება, მოკლევადიანი (1-3 დღე) საველე პრაქტიკა საქართველოს ფარგლებში.

7.2. სტუდენტის მიერ ფაკულტეტის საბჭოზე დაფინანსებისთვის წარმოდგენილი პროექტი უნდა მოიცავდეს ბიუჯეტს (მოთხოვნილი თანხის დასაბუთებას).

7.3. სტუდენტის ინდივიდუალური კვლევითი/შემოქმედებითი პროექტის დაფინანსების საკითხს, ფაკულტეტის საბჭოს წარდგინებით, განიხილავს უნივერსიტეტის წარმომადგენლობითი საბჭო.

## **მუხლი 8. საკურსო/საკვალიფიკაციო ნაშრომის (შემოქმედებითი პროექტების) და კვლევითი/შემოქმედებითი პროექტების დაფინანსების დადგენილი წესისგან გამონაკლისის დაშვება**

8.1. კანონმდებლობით განსაზღვრულ ან სხვა განსაკუთრებულ შემთხვევებში ფაკულტეტის საბჭო მიმართავს ადმინისტრაციის ხელმძღვანელს, წარუდგენს დასაბუთებულ და დადასტურებულ ინფორმაციას/დოკუმენტაციას და ადმინისტრაციის ხელმძღვანელი, შეხედულებისამებრ, აღნიშნულს

განსახილველად წარუდგენს წარმომადგენლობით საბჭოს კანონმდებლობით განსაზღვრულ ან სხვა განსაკუთრებულ შემთხვევაზე გამონაკლისის დაშვებასთან დაკავშირებით გადაწყვეტილების მისაღებად.

8.2. წარმომადგენლობითი საბჭო გადაწყვეტილებას იღებს უნივერსიტეტის ფინანსური მდგომარეობის გათვალისწინებით.

#### **მუხლი 9. დასკვნითი დებულებები**

9.1. წინამდებარე წესს ამტკიცებს უნივერსიტეტის წარმომადგენლობითი საბჭო;

9.2. წინამდებარე წესის გაუქმება, მასში ცვლილებებისა და დამატებების შეტანა ხორციელდება ამ მუხლის პირველ პუნქტში მითითებული წესით.